

Bajet 2017 digesa fokus kos sara hidup

SHAH ALAM - Kerajaan diminta beri fokus terhadap isu kos sara hidup yang dihadapi rakyat dalam Bajet 2017 yang bakal dibentangkan Perdana Menteri, Datuk Seri Najib Tun Razak, Jumaat ini.

Setiausaha Agung Gabungan Persatuan Malaysia (Fomca), Datuk Paul Selvaraj berkata, rakyat ketika ini sedang bergelut dengan kos sara hidup, terutama masyarakat miskin dan mempunyai ahli keluarga ramai.

Beliau menggesa kerajaan membina lebih banyak rumah mampu milik bagi menampung keperluan rakyat yang memerlukan.

"Pembinaan rumah mampu milik adalah langkah terbaik yang dilakukan kerajaan, namun ia harus diperbanyakkan dan diperluaskan ke seluruh negara," katanya.

Selain itu katanya, kerajaan juga perlu



mengambil tindakan dengan mengawal harga siling rumah yang dibina pemaju.

Menurutnya, pemaju sering memberi alasan kos pembinaan rumah yang tinggi, menyebabkan mereka terpaksa menjual pada harga mahal.

Namun katanya, harga rumah boleh dijual dengan lebih rendah sekiranya ada rundingan bersama kerajaan.

"Mungkin kerajaan perlu menimbangkan caj harga tanah, fasiliti atau kemudahan asas terhadap pemaju supaya tiada lagi alasan mereka menjual rumah pada harga mahal," katanya.

Paul berkata, penekanan terhadap pengangkutan awam terutama bas juga perlu dilakukan kerajaan, walaupun Aliran Transit Massa (MRT) dan Transit Aliran Ringan (LRT) telah disediakan.